

## EUSKAL BILTZARREA FRESNON (Kalifornian)

*Patxi Altuna*

Lehengo udan, 1982ko Abuztuaren 23tik 26ra, ospatu zen Ipar Amerikako Lehen Euskal Biltzarre Nazioartekoa Fresnon (Kalifornian).

Mundu guztiko zenbait Unibertsitatetako hogeitamar edo irakaslek, euskaldunek eta ez euskaldunek, eduki zuten esku eta irakurri txostenak, Estatu Batuetako ikastetxeetakoak zirelarik noski gehienak: Arizona, Nevada, Pennsylvania, Kalifornia, New York eta abarretakoak.

Gai askotarikoen gainean izan ziren txostenak: euskal idazleen literaturaren (Maguna-Goikoetxea, Mendizabal), ekonomiaren (Bakaikoa), politikaren (J. A. Garmendia) eta linguistikaren (Altuna, Urreztieta, L. Oñederra, Txillardegi, Allières, Bretschneider, M. Ugalde) gainean.

Giza-mailako harremanak ere ez ziren bazterrean gelditu zenbait ongi-etorri, bazkal-afari eta "picnic" direlakoetan; aipamen berezia zor zaie Fresno Basque Club-eko landa (ala basa?) afariari eta Yosemite deritzan Nazio Parke ospatsura egin txangoari.

Biltzarre honekin Ipar Amerikako Euskal Lagunarteak aurreproiektu aldia garaitu zuela esan daiteke eta Gloria Castresana (Kalifornia), Juan Kruz Mendizabal (Indiana) eta Emilia Doyagaren (New York) gidaritzapean abiada eman zaio zenbait asmo berriri. Horrez gain, 1983an barna Ameriketako biltzarre batzuetan esku hartuko dute zenbait euskal pentsalarik, euskal munduko liburu garrantzitsu batzuen ingelesezko argitaraldiak prestatuko dira: hala nola Mitxelenaren batena euskal hizkuntzaz, M. Ugaldereen beste batena gure historiaz, Txillardegiren eleberri batena, bai eta hamar ipuin eta kontakizunen bildumatxoarena.

Erakundearen egoitza nagusia hau da: *Society of Basque Studies in America - 407 Sutton Hall - I.U.P. - Indiana, PA 15705.*

Harpidedun izateko urteoroko diru-ordaina 10 dolar da.